

9

DE GENUINA
LINGUAE LATINAE

PRONUNCIATIONE

OPINIO

JOANNIS CAROLI UNGER

UNGARI RUSQUINIENSIS

EMERITI PROFES. ET EDUCATORIS PUBLICI
NEC NON CONSILIARII OECONOMICI

MEMBRI ACTUALIS

INCLITAE SOCIETATIS AGRONOMICAE

CESAREO REGIAE VINDOBONENSIS

ET INTER ARCADES ROMANOS

POLIANDRI MARATHONII



— 1885 —

R O M A E

EX TYPOGRAPHEO CRISPINI PUCCINELLI

MDCCCXXXV.

*Quae bona sunt , fieri meliora possunt doctrina ; et
quae non optima , acui tamen aliquo modo et corrigi
possunt.*

CIC. 1 DE ORAT.



Dum pluribus ab hinc annis urbem Parthenopeam iu-
lerem , ab eruditis viris interpellatus fueram , ut opi-
nionem meam depromerem, num pronunciatio latina eru-
ditorum Italiae studiosis aliarum nationum pro regula nor-
maque statui possit. Attente rem perpendens ac examinans
me ipsum conviceram, quaestionem hanc negationem mereri.

Rationes meas iudicio peritorum subijcio.

Universam fere peragratus Italiam, magnam in lingua ro-
mana pronuncianda diversitatem apud diversos peninsulae
populos detexeram ; nam Taurinenses , Genuenses , Mediola-
nenses , (*) utpote Galliis viciniore , multos naevos Gallo-
rum in usum converterunt. Vocalem nempe U, prout illi ,

(*) In Ecclesiis passim : Dominus vobiscom , et per o-
mnia saeculaⁱ , saeculorumⁱ cantantes audieram.

iam U, et ante M et N ut O pronunciant, consonantes C et G gallico more emollientes, legesque de accentu negligentes, dum soli quantitati syllabarum serviunt. Qui confines Germaniae regiones incolunt, plus minus mendaciarum aut propriae nationis contraxere. Mediae et inferioris Italiae eruditi plurimas anomalias ex nova lingua italica, et pro diversitate dialectorum etiam multiplices pronunciationi latinae defectus intulerunt. Longum foret errores singularum specialiter persequi, sufficiat eos generatim perstringere.

In primis tamen media designanda sunt, quibus ad genuinam pronunciationem cruendam utendum est. Hac de causa determinandum ante omnia esse censeo, unde Latini Alphabetum proprium, compluresque voces linguam latinam excolentes hauserint. Nemo eruditorum dubitaverit Romanos utrumque a Graecis accepisse ac Latio intulisse; unde concludendum, litterarum ac vocabulorum graecorum, latina civitate donatorum, sonum, eundem Romae ac Athenis viguisse. Hinc non absque fundamento concludo, Romanos vocabula graecae originis, ut Cedrus, Centaurus, Centrum, Cera, Ceroplastes, Cerasus, Cestus, Cete, Ciliciam, Cinaedus, Cinnus, Cesta, Cithara, Citharista et genesis, gencalogia, genitor, genitrix, gigas, genus, genu, geographia, gymnasium, gypsus, gyrus, graecorum more absque emollitione litterarum K et Kedrus, Kentaurus, Kentrum et sic porro pronunciasse. Nomina propria ut Cephalonia,

Cyprus nunc etiam in ore recentiorum Graecorum Kephallonia et Kypros audiunt.

Quodque Romani eundem sonum inter K et C ad originarie latinas voces transtulerint, demonstrat lapis tumularis graece et latine scriptus, quem in ambitu Vaticani inter inscriptiones antiquas videram, in quo nomen *Marcellus* graece Marcellos (*Μαρκελλος*) scriptum inveneram. Quis porro dubitabit nomen Caesar cum sono K initialis pronunciatum fuisse, si Germanos, qui nomen illud directe a Romanis acceperunt, adhucdum *Kaiser* enunciare audiat? K ergo Graecum idem erat, eandemque vim cum C latino habuerat, prout etiam G latinum semper, non obstantibus subsequentibus E aut I, prout graecum pronunciatum fuisse arbitror. Emollitio igitur, quam istis litteris ante E aut I positae Itali, aliaeque nationes diversimode tribuunt, successu temporis, dominium usurpantibus neonatis idiomatibus, in Alphabetum latinum irrepperat, eamque Grammatici ob commoditatem oris, ad vernacula assueti, data etiam regula, quod C ac G ante E et I emolliri debeat, usu longo ad normam linguarum vernacularum consecrarunt.

Validius argumentum, quod K graecum et C latinum ante litteram E quoque eundem sonum habuerit, nobis Quintilianus Inst. cap. XIII. de risu suppeditat, ubi narrat, Ciceronem in foro amico colloquentem, a filio *coci* cujusdam, qui magistratum ambiebat, voti causa manu prensatum fuisse. Postquam amicus candidato votum promiserat, Cicero ambigue eidem dixisse refertur: *Ego te COCE juvabo* —

quod etiam, *Ego te QUOQUE juvabo*, interpretari potest. Hac ex ambiguitate Ciceronis discimus : Romanos vocativum substantivi *Cocus*, *Koke* et non *Coce* cum emollitione pronunciassse ; porro eos nullam litterae V post Q rationem habuisse, et *quoque* ut *Koke* eloquutos fuisse; unde sequitur emollitionem illam , posteriori solummodo aetate, ex usu vulgaris linguae italicae ad romanam transiisse.

Hinc nil mirum , quod etiam *Erasmus Roterodamus*, *Echo* in Dialogo ad vocabulum *Sacerdos* — graeca voce *ιερεὺς* et ad nomen *Grammatici* graeco *γραμματιστής* respondere sin- nit, quo professus fuerat, se *Sakerdos* et *Grammatiki* enun- ciasse , nullamque litterae C , quae graeci K vices gerit , ante E et I emollitionem admittendam esse.

Attamen, quod usus longa praescriptione confirmasse vi- detur, difficulter ab optimis etiam Grammaticae praeceptoribus eliminabitur. Praetereamus ergo, si lubet, anomaliam hanc, et nos ad alias longe perniciosiores convertamus, quas celeberrimus Grammaticus *Alvarus* admonitione peculiari in Prooemio Institutionum suarum perstrinxerat. Is praeprimis Romanos Praeceptores admonet, ut modo pronunciandi apud discipulos invigilent, serioque barbariem persequantur, quae per Italiam, praesertim vero Romae, incuria magistrorum scholis irrepserat. Nam prout ipsemet asserit, M quidam insequente N perinde efferunt ut N, nempe *onnis* pro *omnis* — *Sonnus* — *condenno* — *dannum*, pro *somnus* etc. Idem illis usu venit post P, litteram hanc aut extinguentibus aut permutantibus ; nam pro *emptus*, *entus* ; pro *comptus*,

contus ; pro *promptus*, *prontus*; et pro *deceptus*, *absorptus*, *decettus*, *assortus* efferunt. D autem ante N saepe vertunt in N; siquidem pro *contendo*, *contenno*; pro *conditor* *connitor* dicunt. Nonnunquam D cum T commutant, ut *caput* *capud* enunciantes. Interdum post S, T et M vocalem E adjungunt, ut *fidelise*, *este*, *abeste*, *Regina Angelorum* dicentea. Lettera C in fine vocis perinde E addunt, articulumque, neglecta aspiratione H, *ice*, *aece*, *oce* effutientes. In medio vocabulorum C ante T vix attingunt; nam pro *sanctus*, *cunctus*, dicunt *santus*, *cuntus*, aut tanquam alterum T pronunciant, *pattum*, *dittum*, *dottum* pro *pactum*, *dictum*, *doctum*; aut *vittor*, *attor*, *dottor* pro *victor*, *actor*, *doctor* efferentes. Eadem injuria afficiunt P ante T et S, cum aiunt: *attus*, *inetus*, *serittus* pro *aptus*, *ineptus*, *scriptus*, iidem J et S nonnunquam supprimunt: *obicie*, *inicio* pro *objicio*, *injicio*; *disero*, *disipo* pro *dissero*, *dissipo* perperam sonantes. X quocunque loco vitiose pronunciant, illius loco S simplex aut duplex substituunt, e. g. *Serses*, pro *Xerxes*, *Felis*, pro *Felix*, dein *dissit*, *fassit*, *dussit*, pro *dixit*, *faxit*, *duxit*; *esaudi* pro *exaudi*, *ausilium* pro *auxilium* applicantes. Saepe etiam pro X pronunciant Z, ut in *uxor*, quod *uzor* efferunt.

Omnes isti, ab Alvaro in admonitione ad praeceptores romanos post frontem Grammaticae suae directa, notati defectus, ex vitioso modo Alphabetum italicum in vernaculis scholis cum *elle*, *emme*, *enne*, *erre* et *r* pronunciandi, quem etiam in scholis latinis sequi videntur, et ex commo-

ditate oris vulgi nati sunt, quam suavis et pronuntiatio facilissima lingua vernacula ad scholas quoque linguae latinae magno cum detrimento puritatis introduxerat.

Maximam vero ambiguitatem subpressio litterae H pronuntiationi latinae intulit. Hanc praeter commoditatem oris Itolorum Alvarus ipse praeparaverat, dum in correcto simplici et pro norma statuto Alphabeto latino aspirationem hanc gravem, praeposita vocali A, quae ipsam absorbat, enunciare docet. Si aspirationem, prout faciunt Ungari et Hispani, vocali A praeposuisset; verius tironibus suis sonum litterae H (quam in Prosodia consonantem esse agnoscit, cum alteri consonae juncta praecedentem vocalem positione longam efficiat) ostendisset, italoque ori pronuntiatio faciliorem reddidisset. Litteram hanc ad bonam linguae latinae enunciationem essentialiter necessariam esse propositiones sequentes docent:

Hos canes Melampus noster per raptum *os* accierat.

Is, *his* dictis nobis valedixerat.

Heri crumena *aeri* destinata fuerat.

Tu non *irae*, sed manducando *hirae* mederi debes.

Ominibus non est credendum, at *hominibus* serviendum.

Per duas *horas* *oras* Ostienses emensus fueram.

Horno vino triclinium *orno*.

Tiro thema *orsum* *horsum* tulit.

Sol needum *ortus*, et iam apertus est *hortus*.

Ubi cultivati sunt *horti*, illic flores sunt *orti*.

Ad Tiberis *ostia* cecidit Neptuno *Hostia*.

Ego ex Pannonia *abeo* Romam , ubi Brennus victor dixit : *habeo* Romam.

Quanta confusio et quae difficultas intelligendi nascitur in ejusmodi sententiis litteram *H* negligendo ! Nonnulli Italorum mihi opposuere , quod contextus sensum salvaturus sit, — quod quidem non nunquam , sed non ubique, effectum nancisci poterit, praesertim in articulis et in pronomine *mihi* quod per abusum in *miki* convertunt.

Serio igitur adlaborandum foret , ut littera haec utpote aspiratio gravis ad normam Graecorum juri usuique suo restitueretur, sicque enunciatio linguae latinae evidenter majoris emolumentum capiat.

Quod hic male pronunciantes claritati linguae rapiunt, hoc alii E in fine vocum perperam sonantes, quasi vero omnia vocabula in vocalem desinere deberent, turpiter addunt. Assuescant igitur juvenes , ut litteras Alphabeti non vulgaris linguae , sed romanae usu simpliciter l, m, n, r, s, t, absque annexo E enuncient. Discant, quod vocabula latina consonante terminata nullo sono vocali subsequente egeant, quodque ridiculum sit cantantes etiam in templis audire : Mater amabilise — Virgo fidelise , Regina Angelorumne ! — enunciantes ; quodque in concionibus praesertim citatio textus latini per inutilia E defigurati cultas aures offendere debeat. Quis enim sine indignatione citantem audiat : Ete faciesse eiusse erate sicut nixe !

Profligatis igitur nunc notatis abusibus efficacissimum medium pronunciationem latinam ad avitum suum splendorem

reducendi assequemur, si examinaverimus ubi nam locorum adhuc puritas enunciationis vigeat. Inter Europae urbes fa-
 teor Romam thesaurum genuinae pronunciationis adhucdum
 in liturgia sua possidere. Divus enim Gregorius M. Papa,
 qui cathedram S. Petri anno Christi DXC conscenderat, can-
 tum ab ipso dictum Gregorianum liturgiae sacrae applicuit,
 sicque tempore illo, quo Romani adhuc latine loquebantur,
 non solum melodias sed et accentum sillabarum ad normam
 et usum veteris Romae posteritati christianae transmiserat.
 Clerici ergo et Cantores principis Ecclesiae illius, traditio-
 num suarum tenacissimi, liturgiam hanc, enunciationem
 ejus, sillabarumque accentuationem inde a tempore Grego-
 rii M. ad nostra usque tempora in tantum conservarunt, in
 quantum nova lingua vulgaris, et commoditas oris puritati
 ejus damna inferre nequiverat. His e fontibus manavit per-
 mutatio *Ce, Ci* vulgaris cum *Ce, Ci*; et substitutio *GE, GI* pro
GE, GI latino, postremo tandem emollitio duarum consonan-
 tium GN in magnus a um, in magnificat, in regno, in gna-
 rus, ignarus etc. quae *manius, maniificat, rênio, niarus,*
iniarus proferunt, ac si e. g. magnus litteris *manius* scri-
 ptum esset. His tribus anomaliis demitis tiro enunciationis
 linguae romanae multum profecturus est, si cantum Grego-
 rianum sedulo observaverit, usumque Clericorum Vaticani
 sequutus fuerit. In Basilica igitur S. Petri, et in aliis, quae
 matrem hanc in enunciatione sequuntur, Ecclesiis magna
 parte inadulterata pronuntiatio romana deprehendi et disci
 potest.

Concessa igitur hac in re Romanae Ecclesiae praerogativa, me ad alias Europae nationes converto.

Linguam romanam uno ab hinc saeculo linguam communem (*πασιγλωσσον*) omnium eruditorum Europae fuisse nemo negaturus est. Angli, Scandinavienses, Hispani, Lusitani, Galli, Germani, Poloni et Ungari linguam hanc tanquam fundamentum vehiculumque scientiarum culturaeque universalis didicerunt, sibi quoque medium efficax ad notions humano generi proficuas communicandas et propagandas stabiliverunt. Eruditi linguam hanc ad normam classicorum authorum genuina cum latinitate scripserunt, quod opera insignia cunctarum nationum palam faciunt, in pronuntiatione tamen plures toto coelo a se ipsis diversi erant, quia vernaculis linguis plus quam simplici et authentico alphabeto romano adhaerentes, defiguratum aut litteris auctum alphabetum proprium latino sermoni intulerunt. Sic e. g. Angli a in ae, u in ju; sic Galli u in ü aut o permutarunt, vocales romanas et consonantes nationali linguae servientes originario sono privantes, accentumque sillabarum absque ratione sufficiente negligentes aut permutantes. Sic nonnulli apud Germanos diversitatem Tau a Delta, et U consonae a F tollentes, diptongosque ad modum linguae propriae efferentes puritatis honorem amiserunt. Nam quis latium sermonem in intonatione Praeceptoris detexerit, dum in Laudibus officii *De ea* praecinit: *Pinguis aest* - (Sic incipit Antiphone, dein continuat) *Tajus Tajus maius, at te de luce figilo!* — Poloni minus erronee enunciant, si in vernacu-

la propria L emollito non uterentur, et consonantem H non velut U efferrent. His de causis ipsos dicentes audiui: Polonus (quasi Polionus) sum atque uomo invicem homo. Nuperrime cum theologo in Norvegia orto, qui in Universitate Christianiensi studiis vacaverat, conversatus, latine cum ipso disserens enunciationem ejus perfecte hispanicae, ungaricaeque conformem exceperam. Idem emollitionem C, prout hae duae nationes, per tze, tzi eloquebatur, G vero nusquam emolliens. Scandinavienses igitur, Hispani et Ungari, qui linguam latinam ante ortum linguae italicae vulguris et postmodum etiam independentes ab illa acceperunt, summam merentur hac in re attentionem. Nam in Hispania coloniae romanae jam tempore reipublicae stabilitae fuerant, et sub Imperatoribus Christianae religionis instituta etiam a Romanis didicerunt; in Ungariam saeculo X. a Silvestro II. Pontifice et ab Episcopis et religionis tum italicae tum germanicae, qui omnes latini sermonis gnari erant, cum religione christiana cultura linguae romanae regno illata, illicque tanquam efficacissimum communicationis medium inter diversos Pannoniam incolentes populos, ad nostra usque tempora conservata fuerat. Pronunciationi purae in illis regionibus nationales linguae, nihil cum romana commune habentes, minus obstare potuerunt, quam italica, gallica et anglica, quae magna ex parte radices suas e romana traxerunt. Lingua enim gothica, arabica, magyrica et slava nullam penitus affinitatem cum romana habent, ideoque

nullum in enunciationem romanae influxum exercere potuerunt.

Mirum profecto est, quod Hispani, Norvegii, et Ungari tantopere ab invicem distantes eandem fere linguae latinae enunciationem possideant; nam ego demta duriore aspiratione litterae H, quam ab Arabis concivibus quondam suis Hispani acceperint, nullam penitus diversitatem observaveram. Ce, Ci emolliunt omnes tres illae nationes, tze, tzi dicentes; at litterae G jus suum, quin illam more Italarum emolliant, relinquunt; de coetero omnia eo modo pronunciant, quo liturgiam in Basilica s. Petri Romae cantari audieram. Demtis igitur emollitionibus vulgaris originis, quatuor illae pronunciationes, S. Petri nempe, Hispanorum, Ungarorum et Norvegiae incolarum concordantes, studiosis genuinae pronunciationis linguae romanae pro norma commendari possent. Quod Ungaros attinet, animadvertendum est, puritatem hanc solum Catholicos Lutheranosque intervigere. Calvini enim asseclae maxima parte nationales Magyari, ex lingua magyarica, quae S simplex ut germanicum esth pronunciat, eundem sonum etiam linguae latinae inferre conantur: sic magyarorum more E saepe acuunt litteraeque I vicinius enunciant.

Ex dictis patet, quod praejudicium multorum Italarum, quod eruditi Italiae, tanquam Successores Romanorum, optime linguae romanae enunciationem nosse et exercere debeant, genuinum praejudicium sit, quodve ipsorum modus pronuntiandi, qui pro diversitate provinciarum diversus est, ob

defectum unitatis nequaquam aliis nationibus pro norma statui possit.

Glorientur interea Romani, quod in liturgia S. Petri thesaurum verae pronuntiationis adhuc dum possideant, quo romanae linguae pulcritudinem, gloriam et honorem tueri possunt, si emollitiones adulteras, quas suavissima et comoda filia, lingua nempe recentior italica induxerat, sedulo evitaverint, et e Sanctuario linguae veteris romanae eliminaverint. Quibus vero sors felicitatem Romae degendi negaverit, hi si recte enuntiationis latinae cupidi sunt, se ad eruditos Hispaniae, Ungariae et Scandinaviae convertant.



Nihil obstat -- J. B. Rosani Schol. Piar
Censor Philolog.

Imprimatur -- Fr. D. Buttaoni S. P. A. Mag.

Imprimatur -- A. Piatti Archiep. Trapezunt. Vicesg.

5835 155